

Ciengx Vaiz

上林县大丰镇皇周小学六(2)班 Banz Cwzseuh/盘哲霄



Duenh sujyay miz ngoenz ndeu, gou ngamq ma daengz ranzdaxdaiq, sawqmwh dingqnyì sing “nga nga——”, dwg duzvaiz heuh! Cij raen song duz vaiz bizbwdlwd byaij daeuj coh gou, dwg goengda cingq yien song duz vaiz okbae ciengx.

Gou hix gouz goengda yaek riengz de bae ciengx vaiz, goengda doengzeiq lo. Faen duz vaizlwg ndeu hawj gou yien. Vaizlwg yienz naeuz iq, hoeng mizrengz dangqmaz. Goengda yien duz vaizlung byai youq baihnaj. Gou yien duz vaizlwg riengz baihlaeng. Byaij gvaq benq nazbyaek, duz vaizlwg yawjraen byaekheu le, couh lumj fatbag nei cung

haeuj nazbyaek bae. Gaemz hung gaemz hung dwk gwn gij byaekheu, mbouj yaep ndeu couh gwn bae haujlai byaekheu. Neix lij ndaej ha! Bouxkawj byaekheu langh raen ne itdingh ndaq gou dai bae. Gou yungh rengz baez beng, hoeng baenzlawz beng hix beng mbouj dauq, duzvaiz lij rag gou baenaj dem. Goengda raen le gig ndatheiq, ndenq diuz faex bien hawj gou naeuz: “Duz vaiz mbouj dingq vah couh yungh faex bien fad de.” Gou cieq gvaq diuz faex bien mbouj guenj s amcaet ngeihcib’it couh fad de, duz vaiz heuh song sing couh cienq gyaеu byaij deuz lo.

Dou laebdaeb byaij, gou raen duz nengznyaen ndeu haeb galaeng duzvaiz. Gou yaengx hwnj diuz faex bien, fad coq nengznyaen bae. Hoeng duzvaiz cix laihnaeuz gou daegdaengq fad de, de cienq ndang gvaqdaеu, gou laihnaeuz de dwg gyo’mbaiq gou, siengj mbouj daengz de yungh doiq da hung de caengz gou, song da hung lumj song aen lingzdoengz, hujfwdlwd dwk caengz gou, Gou baez daih’t raen aen ciengzmienh neix, mbei yaek dek bae, sikhaek doiqlaeng sam cik gyaе. Hw! Caen dwg simndei deng ngwz haeb dem.

Dou daeuj daengz gaiq diegnywj hung ndeu, gij nywj gizneix maj ndaej mwncupcup, cij raen duzvaiz bongh haeuj diegnywj bae gwn. Duzvaiz yiet gaiqlinx raez de dawz go’nywj baez gienj, riengjret dawz nywj soengq haeuj ndaw bak, duzvaiz itmienh gwn nywj itmienh bi diuz rieng de, raen de gwn ndaej gig hom gig diemz. Yawj dwk yawj dwk. Aen bak gou hix riengz ning hwnjdaеu. Haha.

Duzvaiz gwn nywj imq le, aen dungx lumj aen gang hung nei, caekhaex luenz lili, lij ok gong haexvaiz okdaеu. Duzvaiz meh dinghdingh soengz dwk, aenbak nyaijvauvau, lij yawh di myaizhau okdaеu ne. Duz vaizlwg gig cabheiq, seiz mbouj seiz yungh doiq gaeu iq de bae nyex daxmeh de, duz vaizmeh hix mbouj ndatheiq, lij yiet ok gaiqlinx bae riz duzlwg de, caen gyaеz duzlwg de.

Hab baema ranz lo, caiq gingvaq gaiq naz byaekheu seiz, duz vaizlwg lij yiet aen hoz raezrangrang bae siengj gwn byaekheu, gou couh fad diuz faex bien raez bien hwk de. Gou siengj, duzvaiz gojnaengz hix lumj vunz nei, gwn haеux mbwq lo, siengj gwn di mak ityiengh.

(lauxsae son’gyauq: Vangz Gveiyangh/黄桂香)

Gienhsaeh Famh Gyaudoeng Gveihcwz Ndeu

环江毛南族自治县思恩镇人和小学五年级 Moz Canghauz/莫壮豪

Miz coenz vah ndeu dwg yiengh-neix: “Mwnz ciuhgengz gyaudoeng gveihcwz seiz, ancienz caeuq mwnz guhdoi byaij; mwnz famh gyau-doeng gveihcwz seiz, yungyiemj cingq yiengq mwnz byaij gvaqdaеu.” Gamjdaengz coenz vah neix gangj ndaej deng, raeuz cijmiz gag ciuq gyaudoeng gveihcwz guh, cij ndaej daengx ciuhvunz bingzan.

Mwnz yawj! Boux boh’au ndaw bak gamz ien haenx, daengx naj cungj dwg mumh, yawj gij yienghceij dwg cingq siengj gvaq goengloh. Seizneix daenghoengz lumj lwed nei hoengzuu. Hoeng de lumj dwg mbouj raen daenghoengz nei, vanzlij yiengq baihnaj byaij gvaqbae. Seizneix, boux goenggeq ndeu laengz de naeuz: “Boux sienseng neix, seizneix dwg daenghoengz, cingj mwnz caj yaep ndeu caiq gvaqbae ba!” Boh’au gamz ien haenx cungj mbouj yawj goenggeq da ndeu, ndaengqcwq dwk naeuz: “Gven mwnz gijmaz saeh? Gaej baklai! Gangj sat, gyaq ci hung ndeu

cingq yiengq de cung gvaqdaеu, de siengj mbouj daengz doeksaet lo, ngawh mwnh dwk, mbouj rox baenzlawz guh. Boux swghih raen de lo, hix sikhaek yiengq baihsuwx ngut fanghyangbanz, “sw” sing ndeu. Ci sawqmwh dingz roengzdaеu, youq gwnz dieg veh ok diuz riz cing-cingcujcuj ndeu. Hoeng lij dwg ngu h yamq ndeu. Song ga boh’au gamz ien haenx ciengxlwenx louz youq gwnz maxloh lo! Gij ien deng gwn bae buenq ndeu haenx deng vut youq henz gig gyaе gig gyaе. Seizneix, daengloeg ronghsagsag lo, hoeng ga de caiq hix mbouj miz lo.

Ai! Danghnaeuz boh’au neix ciuq gyaudoeng gveihcwz guh, hoj-naengz mbouj fatseng saehhux, mbouj yawjnaek gyaudoeng gveihcwz itdingh yaek cauhaenz huxhung. Hawj raeuz yunghsim geiq ba: Ciuq gyaudoeng gveihcwz guh cij ndaej bingzan caeuq vuenyungz.

(lauxsae son’gyauq: Luz Yinz-hwz/陆银核)



Haijhung Gungxbaekbough

Haijhung ha, haijhung Gungxbaekbough ha.

Mwnz couhwdg ga dah’iq sawdikdik haenx, dwg lwi? Dwg ga dah’iq daj ndaw lueglaeg Byalauz Cibfanh lae gvaq laj ndoibya ranz gou haenx, dwg lwi?

Haijhung ha, haijhung Gungxbaekbough ha.

Mwnz couhwdg ga dah’iq sawdikdik haenx, dwg lwi? Mwnz lae gvaq laj ndoibya ranz gou, couh menhmenh bienqbaenz ga dahlung, dwg lwi? Youh byaij gvaq haujlai roen, bienqbaenz haijhung baenzneix, dwg lwi?

Haijhung ha, haijhung Gungxbaekbough ha.

Mwnz couhwdg ga dah’iq sawdikdik haenx, dwg lwi? Doenghgij ruz venj gangfung hau youq baihyae ndaw haij mwnz, couhwdg doenghgij ruziq gyaepgya gou coq youq ndaw gungxdah laj ndoibya haenx, dwg lwi? Doenghgij ruziq gyaepgya haenx, seizneix, goj bienq hung baenzneix lwma?

Haijhung ha, haijhung Gungxbaekbough ha.

Mwnz couhwdg ga dah’iq sawdikdik haenx, dwg lwi? Mwnz lij roxgeiq gou lwi? Gou couhwdg boux lwgnyez gyaеz mwnz dahraix, ciengzseiz youq henz raiq laj ndoibya guhcaenz haenx. Lij roxgeiq lwi? Mwnz baez bienqbaenz haijhung couh lumz baengzyoux seiziq luma? Vihmaz ne? Vihmaz ne? Lwnh gou nyi vei——

Haijhung ha, haijhung Gungxbaekbough ha.

(Daj 《Bonjsei Sim Lwngnyez》(Veiz Gizlinz raiz) senj okdaеu, Lwgfwnzme/卢奋长 hoiz)